



## **KENYATAAN MEDIA**

### **JABATAN ALAM SEKITAR MALAYSIA**

### **KEMENTERIAN TENAGA, SAINS, TEKNOLOGI, ALAM SEKITAR DAN PERUBAHAN IKLIM (MESTECC)**

---

#### **PENGUATKUASAAN JABATAN ALAM SEKITAR KE ATAS KENDERAAN MOTOR MELALUI OP SELAMAT TAHUN BARU CINA**

---

24 Januari 2020, PUTRAJAYA - Kementerian Tenaga, Sains, Teknologi, Alam Sekitar dan Perubahan Iklim (MESTECC) mengingatkan pengguna jalan raya agar mematuhi peraturan berkaitan pelepasan asap kenderaan motor yang menyebabkan pencemaran udara terutamanya di musim panas dan kering ketika ini.

MESTECC melalui Jabatan Alam Sekitar (JAS) terus meningkatkan aktiviti penguatkuasaan secara bersepadu bersama-sama dengan agensi penguatkuasaan lain seperti Jabatan Pengangkutan Jalan (JPJ) dan Polis DiRaja Malaysia (PDRM) dalam OP Selamat Tahun Baru Cina di seluruh negara dalam menjalankan aktiviti penguatkuasaan ke atas kenderaan motor di bawah bidang kuasa Akta Kualiti Alam Sekeliling (AKAS) 1974.

Sejak 1 Januari hingga 23 Januari 2020, sebanyak 53 operasi kenderaan motor telah dilaksanakan di seluruh negara dan sebanyak 2,117 buah

kenderaan telah diperiksa. Sebanyak 66 kompaun dan 58 notis arahan telah dikeluarkan.

Kesalahan kenderaan motor yang tertakluk di bawah AKAS 1974 tersebut adalah pelepasan asap hitam, pelepasan gas pencemar dan pelepasan bunyi bising yang melebihi had yang ditetapkan dalam Peraturan-Peraturan Kualiti Alam Sekeliling (PPKAS) (Kawalan Pelepasan Daripada Enjin Diesel) 1996, PPKAS (Kawalan Pelepasan Daripada Enjin Petrol) 1996, PPKAS (Kawalan Pelepasan Daripada Motosikal) 2003 dan PPKAS (Bunyi Bising Kenderaan Motor) 1987.

Tindakan penguatkuasaan yang akan dikenakan adalah mengeluarkan kompaun dengan nilai maksimum RM2,000 bagi setiap kesalahan dan tindakan mahkamah ke atas pemilik kenderaan yang gagal melaksanakan bayaran kompaun tersebut dalam tempoh yang ditetapkan dengan penalti yang melibatkan bayaran denda tidak melebihi RM100,000 atau penjara selama tempoh tidak lebih daripada lima tahun atau kedua-duanya. Selain itu, pegawai JAS akan mengeluarkan notis Perintah Larangan yang melarang penggunaan atau pengendalian kenderaan tersebut di atas jalanraya sehingga kenderaan tersebut telah dibaiki dalam suatu tempoh yang ditetapkan.

Tindakan penguatkuasaan JAS ke atas kenderaan motor adalah bagi mengawal dan mengurangkan pencemaran yang berpunca daripada kenderaan terutama sekali pada musim perayaan di mana penggunaan kenderaan adalah meningkat secara mendadak.

Orang ramai boleh melaporkan kes-kes pencemaran kepada JAS di talian bebas tol 1-800-88-2727 atau melalui portal e-Aduan JAS.

**KETUA PENGARAH  
JABATAN ALAM SEKITAR MALAYSIA**

**24 JANUARI 2020**

## LAMPIRAN

Gambar-gambar semasa operasi dijalankan:





